



*Samson prend trois cens renards, & brule les bleds des Philistins ;  
desquels il tuë mille hommes d'une machoire d'asne.*

**V**AND les iours de la moisson furent venus, Samson irrité contre les Philistins, prit trois cens renards, & ioignant leurs queue's l'une à l'autre, lia des flambeaux au milieu, ausquels il mit le feu, & les laissa aller, afin qu'ils courussent d'un costé & d'autre ; lesquels incontinent s'en allerent es bleds des Philistins, & les brulerent, ensemble leurs vignes & oliuiers. Samson s'estant retiré en la cauerne de la pierre d'Etam, fut liuré aux Philistins, lié de deux cordes neufues. Et quand il fut venu au lieu de la machoire, & que les Philistins furent venus au deuant de luy, crians à haute voix, l'esprit du Seigneur entra en luy, & les liens furent dissipez & rompus, desquels il estoit lié. Lors hastiuement il prit la machoire d'un asne qu'il trouua par terre, & mit à mort par icelle mille hommes, puis il ietta hors de sa main la machoire, & appella le nom de ce lieu-là Ramath-lechi, qui est à dire éléuation de la machoire. Et Samson ayant fort grande soif, inuoqua le Seigneur, qui ouurit en la machoire de l'asne vne dent molliere, & d'icelle sortirent des eaux, dont il beut, & restaura son esprit, & reprit force, & iugea Israël au temps des Philistins vingt ans.